

焦太史編輯國朝獻徵錄

焦太史續輯國朝獻徵錄卷之七十五目錄

順天府

府尹

王賢

陳謨

蒯琦

劉淑相

查秉彝

府丞

周璽

吳濬

應天府

府尹

鄭沂

薛均

張璘

彭信

魯崇志

秦崇

高敏

于寃

吳雄

冀麟

孫春

王宸

陳錫

王震

柴奇

孫懋

唐寬

府丞

揚潔

治中

麗嵩

通判

林春

祝允明

呂言

金陵黃應登

全枝

吳興華元儀

錢塘徐象栢

刊行

目錄終

天啟錄

卷之三十一目錄

吳興

焦太史編輯國朝獻徵錄卷之七十五

順天府

府尹

順天府尹王公賢墓志銘

姚夔

公諱賢字惟善其先通州人曾大父璠仕元令樞密院事大父成任虞城尹贈通議大夫順天府尹父友直贈戶科給事中加贈通議大夫順天府尹當元季擾攘避兵山東及我大明定天下遂占籍寧陽公生而岐嶷體態與恒兒異少長讀書潛心問學遂以詩經領永樂辛卯鄉薦登乙榜授鄆陵教諭學久廢

弛公振勵而作興之然必以身爲教嚴條約程課業
不易寒暑又言於有司新學官飭廟祀煥然一新士
咸知向學多所造就焉今戶部尚書張睿前禮部侍
郎兼翰林學士薛瑄皆其高第弟子也秩滿擢戶科
給事中進光祿少卿奉勅淮揚巡視民瘼著廉幹
聲用是上知其才遂有府尹之命輦轂之下兵民
雜處權勢縱橫公不剛不柔爬奸剔蠹一處以公道
人見公言動尊嚴亦不敢以非禮干吏民大化之嘗
以柴炭爲民病語工部石尚書曰京民勞疲極矣今
採運夫役與真保諸郡等無乃不可乎石默然爲遞

減之又惜薪中貫縱其下非法凌府屬叱疏於庭熾
火圍之公聞趨至縛其人欲以聞主者溫言謝乃釋
去一日坐公堂有懸金牌直入稱權勢官索板席若
干公曰明日來取察知其詐及至執之寘於法其處
事多類此九載滿表乞致仕 上不許陞正二品俸
復任又三載再疏乞骸骨 上曰卿年七十禮當致
仕然京畿冗繁非爾不治所請不允 英宗皇帝復
辟之初顧謂近臣曰府尹如賢者何可得哉至是公
年七十有三上章引疾力辭得請卽日上道士民攀
援塞途戀戀不忍舍去公在任嘗修府治學校及宋

文丞相祠事集而民不擾苟有可省卽省之惟恐累於民故民德之深如此成化改元用恩例進階一級授從二品階中奉大夫生洪武乙丑六月二十三日卒成化三年五月三日年八十有三卒之日鄉人無老少皆奔走哭焉公仕內外四十年所至以勤慎稱非義一毫無所取且宅心忠恕待人不設勾絞故人佩其德而欽服焉自休官歸田里十年絕不以勢利關心恒與致仕翰林學士許道中優游徘徊於山岵水曲之間吟風弄月澹如也老子曰功成名遂身退天之道也公蓋得之矣

順天府尹陳諤傳

雷禮

陳諤字克初字一諤廣東廣州府番禺縣人永樂六年舉鄉試入大學八年擢刑科給事中舉劾權貴無所避每奏事大聲如鐘上令餓之數日奏對如故上曰是天生也每見呼爲大聲秀才嘗言事忤旨命坎瘞奉天門外七日不死赦出還職尋陞吏科都給事中一日率同列論事獨上怒落職罰修象房同事者先治完降官去諤貧不能顧役躬治甚力值駕至觀象上問治屋者爲誰諤前俯伏具道所以上憐之命復其官博學愈甚十一年奉使雲南還

命署通政司事逾年署應天府復署刑部十四年署
鴻臚明年改署工部所至能其官十六年六月擢順
天府尹政尚嚴察頗有張趙風嘗出行誤衝皇太
子駕太子訴於上上曰陳府尹是我父母官竟
不問其優假如此既而執政者忌之出爲湖廣按察
副使三載刑政肅清一道無冤獄亦無冤民奏最改
山西坐事落職洪熙改元遇赦應復上曰謬小人
也不宜以玷方面貶海鹽知縣上一日問左右六
聲官人何在宜置轉導使人得聞過乃授刑府長史
多所匡益上賜以忠貞鯁直四字示寵異焉宣德

王官
出爲
郡丞

三年與王不協遷鎮江府同知致仕歸正統九年卒
於家論曰陳公以犯顏敢諫屢瀕於死賴 文皇
仁皇之明蹟而復奮然竟齟齬坎壈其身語云直道
三黜豈欺我哉

順天府尹蔭君琦墓志銘

李東陽

正德六年辛未六月二十日順天府尹蔭君卒於家
蔭出晉韓厥支孫以邑爲氏今世頗希見居濟南德
平者爲鉅族累世弗顯君生而穎出志操非凡兒比
補縣學弟子員成化十年甲午舉山東鄉薦十七年
辛丑登進士第十九年癸卯被選爲兵科給事中累
遷左右都給事中其所論列或獨上累至數十多切
時務嘗勾稽邊儲會簡京營兵馬巡視諸馬房易牧
充楚府冊封副使皆出特遣水泐捧冊以行隨事舉
職無弗稱者弘治六年癸丑擢順天府丞十四年辛

亥乃進府尹君志本愛民佐事既久熟政體知民瘼
壹意撫字徭賦叢沓極力應辦惟財力弗給是懼民
亦安之無異醉嘗條上十二事多行之者三載考績
賜誥命進階通議大夫累贈厥考奉及祖守成如其
官妣皆淑人十八年乙丑 今天子卽阼乞致仕歸
訓子孫化鄉黨率用禮讓於凡世務悉置弗問蓋年
七十有一而卒計聞 詔賜祭葬如例君質直無崖
谷敦尚儉素遇事勤慎不爲表暴而身致通顯以壽
考終亦可以無憾已

順天府尹劉公淑相墓志銘

霍 紹

君諱淑，字恭忠，劉氏，湖廣黃州府麻城縣人。正德九年甲戌，舉進士。十二年丁丑，授南京兵部車駕司主事。十五年庚辰，武皇南狩，尊陣江彬宦者張銳，憑寵爲虐，人憚迎覲。養忠詣儀真覲奏，對不懾。武皇顧嘉曰：「小主事爽辨，乃爾。」遂知名。是年陞署員外郎。十六年九月，陞南京刑部廣西司署郎中。嘉靖二年九月，調兵部車駕司署郎中。三月，調職方司署郎中。四月，實授。是月陞山東左政司左叅議。六年十一月，陞山東按察司副使。八年六月，改密雲兵備。九年

十月陞四川按察使十一年五月陞四川右布政使
十二年七月陞廣西左布政使十三年八月陞順天
府尹先是永樂初徙天下富民填北京供坊廂富戶
役遂籍北京爲北京民年需原籍帑銀有司年徵銀
解戶部發府給富民曰供坊廂役云十五年福建解
銀六千有奇到部部發府曰給富戶府之僚及胥亦
曰合給富戶養忠曰富戶何名給若是銀也胥曰例
富戶亦告曰例養忠曰何例胥曰年承行矣久卽爲
例養忠曰國初土著民寡富戶供坊廂役費需寔繁
原籍帑供寔宜今土著日增富戶隸籍順天與土著

民同間役供費與土著民又同凡有役費府下兩縣
縣下廂坊詰丁投畝均出供費何富戶獨得若是計
銀也胥語塞僚曰銀給富戶乃無後虞養忠曰何虞
僚不答蓋僚媼大臣通富戶賂大臣求必給銀大臣
市權以迫養忠養忠不懾下兩縣數年供需費銀著
籍屢實費不什一著劍曰季嚴費季給銀富民無從
得給銀矣時有輸粟生周慎齊養忠親駿子也富戶
夏昇兄夏杲諫東廠主書暢囑口出投二百金餌周
慎假曰爲囑尹周慎故不識事謂尹可囑入言養忠
叱出夏昇告東廠逮周慎備毒刑訊曰必言尹與知

謀乃免。夙曰：尹實不知，願自死。大臣嘆東廠逼拳尹家童，與知謀連玷養忠。養忠憤曰：權奸敢爾，遂訴大臣，囑託納贓數十事。上知養忠言實，欲兩全，乃詔不問養忠。童玷大臣贓跡，亦寢獨謂養忠。許大臣罷養忠，出詔獄。到家踰年卒。君子曰：養忠奇男子也。侃侃剛直子，身撓虎豹之吻，了無懾色，不遇明主，身禍未知所底。雖未沾恩，大昭衷素，不可謂不幸也。已渭厓生，韜於養忠。同年養忠許大臣贓跡，大臣抗憲獄，由波及韜。故志養忠墓，著養忠獄由，微顯聞幽之旨也。

順天府尹查公秉堦墓志銘

徐階

嘉靖辛酉閏五月十有六日亞中大夫順天府府尹
近川查公卒於官其子太學生志文以訃聞賜祭一
壇命有司治葬事 上方慎重卹典卽於例合猶必
問其人何如而公位三品未滿一考獨獲被 恩數
於是士大夫仰見 上之知公又惜公幸既受知而
不及竟其用也公爲人凝重簡遠有黃子之度若常
獨見謂長者耳及臨事確有定守不可以毀譽利害
擾之使亂迫之使急至於進取之際澹如也當始舉
進士時將疏請展墓或謂公宜少述以需臺諫之選

笑不應及予告還例授黃州推官九公者雖至終笑不應其在黃州諸所讞鞫不視上官意爲重輕亦不以請託有所縱捨召拜禮科給事中上議舉莊敬冠讀禮當事者惑傍言不敢任而以禮繁難行爲解公抗疏請簡其儀節後踰年卒如公議行之楚世子弑其父有司未能正法公覈其報訃日月之訛而律以春秋不嘗藥之義獄遂定轉戶科右給事中尋轉左會朝覲考察疏陳黜酷吏禁罰贖緩征科等若干條語多犯時忌竟以言謫雲南定遠典史復爲建寧推官遷刑部主事改吏部累遷至文選郎中盡取諸條

例去其舛複裁爲一定吏不得爲奸有干請者溫詞遣之卒無所撓屈間見誚責居之如常或致以迎合謝不能而起遷太常少卿改大理少卿遷太僕卿所至舉其職遂尹順天涖事五日觸暑得疾以卒距生弘治甲子四月十三日年五十八耳公之先出於周以所食邑爲姓唐時胥臣爲司空師詣爲柱國南唐時某爲尚書宋時某爲龍圖待制其後有號仁齋者自休寧徙居海寧之花園七傳至御史中丞約於公爲叔父故公祖益封南京刑部主事又封奉政大夫而公父繪號雪岐生四子公與仲兄南京刑部郎中

秉直相繼以科第起查氏遂益有聞公於爲子爲弟
以孝敬稱撫其伯兄之孤志學志譽以慈稱自爲諸
生以文稱歷官以廉稱然未嘗自表暴與人處退然
若無能者益其性然也子男三長卽志文次志宏領
戊午順天鄉薦次卽志立舉丙辰進士今爲禮部郎
中

順天府丞周璽傳

周璽字天章弘治丙辰舉進士除吏科給事中時
孝皇優容直言璽抗疏有關國體切民隱者多見
采納轉工科尋擢禮科都諫迨武宗初服逆瑾擅
權惡璽直乃降順天府丞實則抑之也未幾同錦衣
指揮楊玉勘事赤縣楊王者瑾之黨也衆見玉皆低
首璽獨與抗辭色不少假借事竣瑾嗾玉誣璽蔑視
近臣遂矯制付詔獄極其拷掠身無完膚弗少屈
曰吾死不足惜使忠義畏愞爲可惜耳瑾聞益憾之
使削籍奪其勅命尋卒於京邸越三年瑾伏誅國是

既明用言官議還其官遣守臣諭祭併復其家 世
宗繼統詔錄先朝守正被害之臣當道首以聖言遣
官加恤典有抑鬱未伸遽焉淪沒之句賡叙其嗣

順天府府丞景公溱墓志銘

王崇古

公諱溱字濟之別號蒲津公生於弘治壬子二月卒於嘉靖癸丑五月壽六十有二公生有異兆性淳氣清祖翁鍾愛之八歲侍祖寢食孝敬如成人卽學日記千言祖翁臨終特貽以書舍地泊祖母遺物執其手曰兒將大我門惜予不及見耳公涕泗奉教隨父廬祖墓側父遘疾泣請以歸父歿公哀毀幾絕痛母寡多疾卽祖遺舍力學定省母稍不御藥必號泣跪進每祈天請身代母賴以康癸酉舉於鄉叔大叅公致政歸乏嫡嗣懇王孺人求公爲繼公痛違所生泣

謝不忍後叔翁許後以榮兄嫂公勉從母兄命權奉
叔養庚辰登會試辛巳賜二甲進士第考出繼無地
封父母例作書告叔翁請如約書父母籍誓毋忘叔
父母養祀以全家庭孝友詞意誠怛聞者感焉尋授
南京陝西道監察御史便省母叔曲全恩禮日念遠
違母叔常鬱鬱未期忽膺疾告還二年疾愈遇詔促
諸在告者期甚迫人勸公行公曰吾母叔老而依我
甚慶違孝致忠非時也竟不赴叔父母先後卒公侍
疾執喪一如子職督嗣人治塋葬率子孫歲時祭享
期百世無替叔遺豐產尺寸無取孳居母喪慟毀骨

立餼粥期年而深墨遠覓南杉於壙奉父母合窆既
終制猶縞素逾三歲遇歲時生忌羞祀必躬每至墓
道攀栢悲號終身永慕不衰敬伯兄如父平生無違
言失色終身不異析愛姊篤生養歿葬仍撫庶孤存
其祀育諸姪暨諸從姪如子教養婚嫁慈惠周至對
夫婦如賓盛暑燕居未嘗有佚容劉孺人無出嘗爲
取兄女育逾已出長擇名門厚裝歸焉睦宗族親黨
有禮周給恤患內外賴以立者甚衆始公赴南臺任
甫數月卽糾論武臣于進詞連中貴及郊迎立閣威
貪功冒封語侵宰執士論稱直雷都介場中宦久依

爲市公嘗巡視搜詭冒慎出納革樣米禁公私科擾
儲政一清云家食旣久充養日遠離臺余公光薦公
才賢奉命復起公北臺公辛采端凝論思忠懇每監
禮隨駕敷奏趨跼肅有常度 上時注目焉尋按畿

內首罷貴臣赴 陵供需繼疏止薊山開礦餘免刑

興利辨冤救荒疏凡百上咸稱旨官民甚賴之將代
詔築沙河官城司空奏檄近郊民供役時北虜數
入寇關隘久壞又吏治多污微斂日煩公條上四事
曰慎選任以清政本日溥實惠以厚邦本日增邊防
以固邦圉日停修築以寬民力 上皆嘉納城工得

暫停後二十年虜犯近郊卒如公言繼監丁酉畿試
防範有方尋按江右江右俗健訟多貴臣號稱難理
公既渡江嚴科條數十款洞悉民隱禁教誘抑豪右
吏民懷畏誦之不衰會 章皇后梓宮下九江公迎
護月餘寢食俱廢徽所司蒲祀儲備無敢不虔而諸
護使餽遺咸謝罷使者不悅冀有以中之會風便能
舟一夕渡湖 上聞賜文綺君子謂公忠誠所格云
公兩按南北黜貪壘抑僥倖獎廉拔滯糾名覈實凡
所舉刺賢否心服律已清正御下溫嚴日費不百錢
每行郡必令有司檢封衣笥江右北還衣多敝不充

原筭雖圖書亦不少攜諸司以趙清獻目之所至興
學課士斥浮崇正昌黎表韓公祠豫章建文謝祠修
白鹿書院申明欵規英雋多出其門登顯仕者繼與
制京畿卷主閣中臺章奏咸務尚體要中丞獻替多
公草定以年勞擢順天府丞約已除蠹官府肅清會
司徒議徵畿民牛車空運京粟出關公卽疏陳不便
民狀仍上便宜數事竟從公議無何公疾作累疏請
告清議重惜之公先後家居三十年杜門謝客讀書
賦詩教子耕讀坐臥一小屋闕堵不治喪無餘資澹
然如寒士足跡不入公府人不敢干以私獎勵後進

疊疊不倦每聞軍國重事繫忠理開慨然不怠憂監
司表薦數十竟不起命也公歿之歲元日有龍起公
舍既病革兒童聞空中鼓吹音忽雷雨大作乃逝嗚
呼異哉

順天府府尹鄭沂傳

雷禮

始定
府尹
體

始設
推官

鄭沂不知何許人國初入仕歷監察御史洪武三年
沂言京師爲天下根本四方之所瞻仰爵位之設當
使內尊而外卑內重而外輕所以隆國勢而安天下
也今南京北京知府與在外散知府同甚失內外之
統宜改應天府知府爲南京尹則國體尊而爵位當
矣人命至重古人所矜各府宜設推官一員專掌刑
名不預他政庶責有所歸而人無冤抑矣又殿中侍
御史之設所以備顧問司諫諍其員不可一日缺也
今又虛其職豈以天下之大人材之衆而無能勝其

任者哉宜從銓註以肅朝儀又各處雖立遞運而凡
轉送官物多僦民船每致擾民今當廣增遞運船數
與稅糧內定民貨力之厚者以充之國家征伐必資
馬匹宜於兩浙空閑之地設牧馬之官選牝馬養於
其中數年之後孳息蕃衍足以備武事 上皆從之
四年任六年致仕

應天府尹薛均傳

薛均湖廣黃州府蘄水縣人曾祖天定仕元爲兩淮都招討上護軍祖楚聊襲總管父徵元兩淮水陸都統制從高皇帝渡江叅知幕府督金華軍事均生時徵夢人投萬鈞懷中遂名萬鈞以高皇帝命更名均少有奇節好讀書見羣兒逐戲輒唾去不顧里中人奇之已而補博士弟子治五經名籍甚性又峻潔清苦而敦孝誼會郡守李公以愷才舉召赴南畿上十策高皇帝見而驚咤久之將大用而均陳臣母疾危放歸其明年上辟天下文武廉能之士郡

人江勝等復以均聞因授辦事州同已而除揚州府
泰州州同授承務郎御史嚴以均固非百里才保署
兩淮都轉運鹽使司知三品事加宣德郎未久除知
合州 文皇帝詔入爲陝西行太僕寺卿以內艱歸
哀慘三年如一日詔取均不出再詔再不出凡三詔
而均出授均應天府尹益尚廉明獨買頓舍餘一片
地種蔬甚具旦莫荷鋤往芸之神王也日飽餽粥菜
茹 文皇帝密使人廉之偵其飯餽粥也笑曰人皆
樂惟孤與均苦耳然庭無廢事應天先是以租不時
收當事者皆以罪去均到官莞事戾月輒完報頃之

種蔬
百食

卽乞歸其奏曰均昧死上言臣以一介之夫榮資到
今曾亡豪奢蓋國事而做簡 聖心猥越滂泥此臣
罪令擢髮奚數顧臣今年七十老矣亡能堯事惟

陛下財察時 上特進均禮部侍郎固雷均均拂衣

去不顧性不善交多齟齬貴人歸畧人謂均宦深多
金也需其出私發均篋惟寔資一具畧人莫解也詰
之故均曰遺兒孫無它長物令世業此當有以活矣
貴人悵然噤口者久之其清苦如此歸剪茅構廬蕭
然蓬茨足蔽風日諸當事貴人造均均思不一見也
晚號隱林野老吟咏自喜居恒念母甚構望雲岳爲

詩若干讀之輒泣數行下云

應天府尹張璘傳

實錄

應天府尹張璘字文王湖廣黃岡人永樂中由進士擢山東布政司右叅政改山西宣德二年調福建考最陞應天府尹璘聰敏廉潔幹濟所至恤民爲京尹不諂事中官雖屢譏璘於上不聽宣德七年九月以病歿

應天府尹彭君信墓碑

王 隄

君彭氏諱信字中孚浙江仁和人少以才俊補郡校
生力學工文詞在諸生中已燁然有聲景泰庚午中
鄉試辛未中進士甲科會憲臣有言宜選進士才茂
者積學中秘如永樂初故事君與選入翰林爲庶吉
士癸未擢山東道御史巡歷紫荆諸關塞修城堡建
斥堠防慮周悉邊庭爲之無警乙亥巡按廣東時嶺
南未靖武將專征頗易君儒生君初不爲較一日將
出師誓衆君伺帥語間爲陳說方略申嚴號令揆度
事機切中要害卒之殄滅夷僚吾兵無挫嗣君指縱

之功居多。俘秦帥以彼所得賞格讓君。君曰：吾文士也，吾自有階奚以武爲識者？偉其功而多其不伐。丁丑，拜父喪歸。抗服除，改貴州道監察御史。母姚氏爲太孺人。己卯冬，巡按陝西歲滿，且代藩憲交章願留。謂關右民勁悍，其翼悞者至不能自立。君治之，疆者鋤弱者植，威惠並行，得憲臣體。上從之，爲留君再期。壬午，巡按河南。蓋君自陝西還，未浹月而關以東與河南北境風聲所至，奸宄屏跡，吏無受賂而流移。占復當是時，君爲御史秩且滿，巡歷諸藩無寧歲，其勞績茂著。上在東朝，雅知之，及卽位，遂陞君順天

府丞順天畿甸在禁轂下征徭常倍逋他郡加之遠
官貴人園田錯午侵牟武斷民用困瘁君贊治之暇
周行列邑楊挫折之威施拊循之政方嚴之下惠裕
繼之三年奏課賜誥命階中憲大夫加贈文宗善如
其官母封太恭人會應天缺尹陞君任焉壬辰四月
甫蒞任秋八月巳酉感風疾卒先卒一月其兄恭自
杭奉太恭人來就養時年七十有九君退自公輒携
其子明娛嬉母前明纔十二君撫之告母曰兒幸荷
國恩得至此圖所以報不徒欲遂吾一家之歡益將
推以及民老老幼幼俾無一家之不遂其歡嗚呼君

之志何如也而今已矣此間巷之民所以奔走弔哭
慕之切而哀之深也君爲人性度坦夷人謂其有納
污藏疾之量至於遇事敢爲果斷立發則又謂其不
茹柔吐剛君生永樂辛丑享年五十有二昔同年讀
書秘閣者二十八人而出杭郡者四人相得一時歡
甚厥後二十八人者榮辱升沉之外又重有存歿之
感獨幸君與王學士獻童庶子緣張刑曹瑄囚人者
皆無恙而予與太常又獲陪君同仕于南都方竊自
幸而君又去予以歎此予所以慕而哀之抑又有甚
焉者也

應天府尹魯公崇志傳

京學志

公諱崇志字懋功浙江天台人父穆累官都察院右
僉都御史風望重一時公爲兒時聞家學已屹然有
自立之志景泰庚午領鄉薦邑令臆以白金力辭弗
受甲戌成進士授吏科給事中彈擊不避權要上
嘉獎之賜五倫書一帙天順初奉勅齎銀數萬兩給
賞邊戍防範嚴密下無敢欺戍者皆蒙實惠尋命賞
京士衣絮其立法之嚴施惠之均與前賞同時武臣
暫欵跋扈舉兵犯闕公適待漏闕下駭其事卽馳馬
與曹一偏裨格開大軍尋亦合而曹就誅矣癸未陞

南京太僕寺少卿公編歷州郡釐其宿弊傳以新法
不數年馬遂蕃息而民咸稱便成化癸巳陞應天府
尹先是七邑民阻饑逋賦數萬石公爲勸貸以代之
輸而賑其貧者溧水民孔姓者武斷於鄉人患苦之
有司莫敢撻公擒置之法中人王敬怙勢以鹽二萬
引懇嚮規重利公厲色拒之蓋公急於爲民雖舉世
所趨不難出身以當其衝慨然有烈丈夫之風焉壬
寅九載秩滿加正二品祿仍掌府事明年癸卯八月
二日終於位壽六十有六計聞遣官營葬仍命藩司
諭祭公爲人愷悌詳雅以公廉自持怨有不讐而德

無不報一介不苟取子尤加意青衿今學櫛星三門
猶公所創建云

應天府尹秦崇傳

實錄

應天府尹秦崇字智崇山東單縣人天順四年進士授兵科給事中憲宗卽位初與諸科劾權倖舞法者成化元年貴州蠻酋起爲邊患朝廷命將征之崇往監其軍奏凱還加俸二級累遷都給事中七年陞太僕寺少卿十七年陞南京先祿寺卿轉南京太僕寺卿弘治三年遷應天府尹明年八月卒官邸蕭然府丞冀綺合賻贈爲治後事訃聞賜祭葬如例崇性剛勁不屈居官三十餘年皆貨財出納之地而不爲所汙可謂難矣

應天府尹高君敞墓碑

吳寬

弘治戊午十一月八日應天府尹高君以暴疾卒年五十七上聞訃命官諭祭營葬悉如例君諱敞字德廣姓高氏蘇之崑山人累世疇蹟無顯者惟積德久始發于君初其父祖見君谷美謂必振其家擇經師遣從之游弱冠學且成充縣學生成化辛卯鄉試中式明年會試復中廷試蒙賜進士出身乙未授禮部主客司主事戊戌陞精膳司署員外郎辛丑陞本司署郎中數月實授丙午擢順天府丞弘治辛亥丁外艱服闋改應天府丞丙辰再擢府尹君在禮部

時數奉使於外當今上初立爲儲副命頒賞賚南

京承接上下儀度雅飭文武大臣咸器重之再遣遼

府行冊封禮還復齋銀幣賞大同將士之有軍功者

南北跋履未嘗寧居會有府丞之缺吏部以君有年

勞推擢陞任時府事方殷佐治不倦及今上卽位

耕籍田君執事恭謹禮成賜宴人以爲榮畿內饑具

疏言民流亾狀乞發內帑白金五萬兩賑濟詔如其

請民賴以甦者甚衆鄉試爲提調官已而行考察法

黜陟屬吏惟公及爲府尹政務填委以次裁決畢卽

欲以簡靜治之或勸以都下非外郡比自古尹京者

必嚴厲明察始稱其官君笑曰任吾性而已公退輒與賓客讌飲如平時久之吏樂其簡民安其易府中殆無事君美儀觀襟度疎潤不立厓岬與人處盃酒談笑歡如也篤於孝友母弟爲人贅壻而卒養其孤寡於家至宗鄙貧乏輒有所濟嘗以強恕自號足以見所志矣

應天府府尹于冕傳

實錄

于冕字景瞻浙江饒唐縣人少保兵部尚書謙之子
景泰元年以謙功廢授世襲副千戶謙死冕亦從坐
謫龍門屢上疏白其父冤 憲宗登極謙冤昭雪并
復冕官冕自陳不願武職改兵部員外郎累陞禮部
郎中南京太僕寺少卿應天府府尹致仕弘治十三
年十二月卒於家賜祭葬如例冕雖不由科目然頗
涉書史有幹局歷官能舉其職卒無子謙後遂絕先
嘗請以其遠族人之子允忠爲後今襲爲杭州衛副
千戶

應天府尹吳公雄墓志

公諱雄字文英姓吳氏其先杭州仁和人自其大父始居京師公少能自力於學成化丁酉舉鄉試明年第進士授刑部主事丁父憂服除仍舊官乙巳遷員外郎河南湯陰淇二縣與大名之濬縣比壤民俗雜採議者欲割濬地隸河南濬人証營不服至相殺傷朝命公往視之爲正其分界仍罪其健黠者數人事遂定尋晉郎中長淮衛指揮彭瓘貪縱豪奪其下訟之且誣其家塚域盜穴穿皇陵山脉以驚動聽者公按之止得其貪暴諸不法事父子皆決配數千里外

以爲平弘治辛亥陸河南副使會使久缺多留獄公
至樞司事盡取而決之獄爲之空丙辰轉湖廣按察
使時歲旱城中有火輿公禱而雨火滅旣而連三歲
旱禱輒雨楚人歌之郴州蠻侵掠居人有司蒐捕之
窮詰其黨欲盡致之公言於巡撫者以爲此孱弱
小醜無能爲必喜事者爲是張皇耳第取其首惡誅
之餘無所問有衛卒以私憾殺其宗人而棄其尸僧
寺之井中其妻子踪跡得之訴于官卒夜令人啟寺
中棺出其尸易置之明日視之則非其所殺者衆莫
能辨公他日避雨寺中見一棺血痕淋漓疑之乃召

其妻子往驗遂得其情已未拜應天府尹初視事日
集僚佐堂上令吏人執簿出公帑所積貯一一點視
之曰政貴謹始也果亡去銀若干鈔公密察之卽得
盜者一府以爲神先是給路引於府者例入錢以供
堂餐尹多自取之公獨籍之官或以爲矯明年兵部
下令收諸路引錢歸之京師以備邊用衆益服公之
廉明南京有長橋橫江口歲久圯壞有司重於改作
公召諸富人語之曰爾曹皆大家也與其施財供佛
爲無益之費豈若移之治橋之爲大利益邪衆皆忻
然應令壬戌南畿旱應天爲甚總漕者亟征兌運米

公曰民病已甚不可重擾輒奏止之又請兩淮所貯
綱米三十餘萬石以賑饑者全活甚衆甲子秋監鄉
試以積勞成疾會當入覲兼程行比至潞河疾增劇
召其子大經等謂曰吾官至此分願已足願有老母
在不能終養以爲憾耳汝曹可馳往應天迎歸謹事
之遂卒蓋其年十月二十九日也得年五十有六計
聞命禮部諭祭于其家工部營葬域公爲人簡直居
官廉謹奉法棘棘不阿臨事能斷摧奸擊惡推見至
隱而心一主於惠愛嘗讀趙廣漢傳嘆曰構會吏民
以賊無辜是豈爲民父母之道宜其見刑也至龔黃

傳則曰爲吏者當如是矣公志嚮遠大常以功名自
許所至皆有聲及尹京府才望益著乃不究其用而
止君子惜之大父諱清父諱春皆以公貴贈通議大
夫應天府尹

應天府府尹冀綺傳

應天府府尹冀綺字汝華揚州寶應縣人成化己丑
進士授戶部主事歷員外郎郎中以歲饑賑濟河間
諸府稱旨往偏頭關督餉有功加俸一級累遷應天
府府丞南京太僕寺卿應天府府尹嘗陳邊務及捕
盜輯民二十餘事頗見採納已而坐言官論劾自陳
致仕正德五年八月卒

應天府尹孫公春傳

祥符文獻志

公諱春字一元爲開封之尉氏人遷汴大父貞兩淮
運判艾瑛以公貴封戶部主事贈署郎中事員外郎
公生有異質爲諸生開封郡庠性剛直寡合獨嗜學
不倦成化乙酉領鄉薦戊戌舉進士授戶部主事歷
署郎中事員外郎丁外艱服闋實授郎中尋陞知鞏
昌府鞏昌地鄰番族獯難治公職無不舉副使王雲
鳳御史王凱奏公仁愛如廉范勸課如龔遂撫字如
陽城清直如包拯巡撫都御史周公季麟督餉都御
史李公鏗奏公政績偉異給白金綵幣以旌之任將

滿陞貴州左叅政奉勅提督糧儲三載陞廣西右布政使尋轉左御史陶煦言公事體練達才識老成將三載陞應天府尹歲餘言官誤劾公嘗市柎木媚大臣焦公芳公具疏白事始末遂懇乞致仕時年已六十九矣公請老還汴治城南草堂集鄉里諸耆艾爲會日巾車往來觴詠談笑其精明剛大之氣老而不減云平生不蓄姬妾任宜人卒縵居十餘年以終壽七十有四

應天府府尹王宸傳

應天府府尹王宸字具瞻其先河南邠縣人因從戎籍于真定弘治庚戌進士授吏科給事中遼東守臣妄殺夷人冒功次命宸往案之尋遷刑科左給事中禮科都給事中 上新立番僧那卜堅叅道士陳應循以左道出入禁掖宸請明正其罪戊辰遷吏科都給事中己巳遷光祿寺少卿庚午遷南京太常寺少卿壬申遷南京光祿寺卿乙亥擢應天府府尹明年乞歸又四年卒時正德十五年十月賜祭葬宸始終清慎爲士論所與

應天府府尹陳公錫傳

黃佐

陳錫字祐卿南海人宋朝散大夫康延之後祖觀字
思賢布衣博學敦行從孔伯平遊不求聞達工於詩
學士黃諫擬諸姚鵠岑參有滄江集行於世父珙字
伯玉以戴記授徒貢爲上猶訓導以身率諸生時張
弼知南安府甚加敬禮嘗夢崔清獻教之曰子知學
乎毋不敬內敬恆存思無邪外邪難入寤而索諸言
行錄果協於是終身誦之世傳細素至錫尤力學弘
治乙丑進士授戶部主事嘗司廩逆瑾方用事羣瑄
列中外雖東芻出納亦混主計錫以法繩之衆不敢

肆司漕通州革弊政六條人以爲便轉員外郎調吏部稽勲自尋陞郎中一時名流咸所咨決屬舍人朱麒求襲封保國公錫駁之曰洪武之約非有重大軍功不得封爵襲蔭今朱麒襲公非約也宜從始封伯爵尚書楊一清從其議因著爲令正德丁丑遷福建參政歷左布政綏定叛軍鈎稽乾沒樹立風紀綽有令聞擢應天府府尹去之日閩人爲立遺愛亭居應天未及三載廷議欲晉孤卿錫竟請致仕凡三疏得允優游田園以翰墨自娛凡十餘年始卒年八十有一賜祭葬郡人祀之鄉賢祠

京兆尹王公震傳

歸有光

京兆尹王公震字威遠曾祖景賢初自燕南徙任縣
遂占籍于邢今爲邢臺人祖楷宣德間以鄉進士爲
平度州同知抗中使誦戍深川數歲病思歸于整上
疏代父整戍又二十八年始赦還整妻亦歿於戍後
妻生公體貌豐偉善騎射博涉經史弘治癸丑進士
觀政大理授戶部主事奉使部送犒軍銀于西夏至
紅城堡後又使雲中至陽和堡猝爲虜圍公皆率衆
守禦虜以解去正德初權九江稅利墮愛幸蒼頭奴
唐英王俊至多所誅求公絕不爲禮時堪估權流毒

天下士大夫二人還欲訴于瑾皆病歿於道人以爲公幸遷員外郎尚書韓文爲瑾陷下獄罰贖二千石公率其僚捐三年俸贖韓尚書得出庚午川湖盜劉烈起猖獗甚上命兵部尚書洪鍾討之洪尚書奏公知兵請以爲鄖陽守迄平寇甚得鄖陽之力歷陞河南右叅政潁川盜小張虎嘯聚公往捕之不四月小張虎就擒戮小張虎餘黨全活甚衆川人感其德立祠祀之嘉靖初陞河南左布政是年冬陞應天府尹奏罷上元江寧花園夫千餘人省諸官寺獄具銀千餘兩贖江灘蘆葦千餘頃以佐赤縣里甲費尋上

書乞骸骨歸初公舉進士二親皆在堂未幾相繼卒
所至扁其居爲永感長沙李文正公率館閣諸公爲
賦詩趙郡石文隱公爲之序自是每陞一官必悲思
其親自在部已獲推贈反爲京兆得贈三世皆如其
官公天性純孝有厚德嘗在京師鄙人張得才爲部
從事病死妻子貧不能歸公聞之愴然捐金助其喪
還後其子寅中鄉舉來謝言其父喪前至金陵欲寄
其鄉人舟鄉人負約遂寄他舟經小孤山泊人之舟
覆過吉水欲寓山寺寺僧固拒不納經夕而寺焚以
公之施惠孤喪與神明符也公既歸所蓄書數千卷

悉輦送部學以資學者講習家居杜門足跡不至公
府今邢州士大夫雖隆貴門第不改布素至以造官
府爲耻子弟斂戢市無綺紈之遊繇公之化也嘉靖
辛丑年八十二卒計聞 賜葬祭

贊曰予至邢訪其先賢士大夫近代皆稱王京兆京
兆所居官其條放方略無文字可考僅僅得其家狀
履歷然今邢中風俗之厚本于京兆予數過學官取
其遺書讀之爲之歎息其高風可仰矣予以是論次
之

應天府府尹柴公奇行狀

陸深

公諱奇字德美號黼菴姓柴氏崑山人也其先出處
定有諱廷富者元萬戶公之始祖也公生而穎敏初
同故禮部主事盛公鍾濟陽令抗公東往謁太常卿
夏公仲昭公未出私約分識其堂間文字凡若干篇
及歸書之不遺一字與故太保顧文康公同爲邑庠
生時令崑山者慈谿楊公子器有鑒賞才尤慎許可
一見公所業文卽曰此奇士也因屬以遊浙中用博
聞見弘治壬子遭通議府君之喪家適中落公畢力
營喪葬如禮辛酉中應天府鄉試名在第六主司刻

其文以程多士正德辛未與弟太同登楊慎榜進士
觀政吏部時少師楊公遠菴爲冢宰上書言東南水
利事深爲楊公所器復極陳白茅塘鴉浦之利害請
以逆瑾沒入貲給濟工費楊公上其議於朝特命工
部尚書李公充嗣往司其事績用告成實公策也是
歲八月吏部考選科道以諫評論試諸進士公居第
一銓授吏科給事中時劇賊劉六等弄兵山東朝廷
討之命將出師以公與御史吳堂爲監軍旣班師有
白金文綺之賜權貴囑託一切絕不行所核功罪皆
當壬申二月賊陷曲阜城禍及闕里禮籍樂器皆焚

蕩公奏移曲阜城以就孔廟永爲保障九月凱旋
俘賜金織鸞袍與宴兵部加俸二級公酉六月丁計
淑人憂弟太任刑部主事適卒乃扶攜二柩歸葬如
禮乙亥九月服闋丙子四月還朝復除吏科給事中
丁丑六月滿一考授勅階被仕郎八月遷戶科右給
事中戊寅夏再遷左於吏科當事多所建白疏上卽
焚草間有傳誦者若武宗南巡之疏錢寧持寵之
劾與邊儲屯政事關大體益有人所不能言者己卯
八月陞南京光祿寺少卿時武宗駐蹕南京凡諸
供應皆先事而備若寺之地廢次第興復查革更正

多所修舉辛巳夏今上登極詔考察京官適寺長
闕公奉行惟謹黜屬吏不職者五人查復厨役占於
他所者凡百有二十餘人謗言叢集一莫之顧然竟
無他壬午改元公力辭加俸上以公山東河南剿
賊之功不允八月進階奉政大夫癸未三月滿一考
丙戌十月六載考績加授修正庶尹己丑三月進贊
冊立中宮薨至京陞應天府府丞值尹闕攝篆者五
月巡撫都御史陳公祥特疏之辛卯三月以郊祀
恩進階中憲大夫八月鄉試充提調官正事惟謹壬
辰九月陞應天府府尹秋八月頒詔例授誥命封贈

及二代仍廢一子入監甲午春清查官占埋沒地還
之民間以絕權勢起佃之謀復積村試羨餘開拓貢
院矩範儀觀爲之一新是秋鄉試再爲提調官會南
京太廟災引咎自陳致仕得請卽日東歸家居幾十
年足跡不入公府口不談貴顯時事惟以詩文自娛
樂而已周貧賸族則奮袂爲之不受也公性孝友歲
時祀先必流涕每謂其子曰祖宗功德不可忘吾平
生無夢夢必有兆皆祖宗之報嘗憶山東時夜遇呂
孟社身在賊中暫止郵舍就草榻倚垣遂夢而祖呼
我曰速起遂起寤驚而頰疑爲賊乘之乃啟戶出探

有逸馬觸垣悉壓覆榻上旁近無完物矣此祖宗之
佑也爾子孫謹識之公以成化庚寅十月十有九日
生以嘉靖壬寅六月七日考終于正寢年七十有三
所著有石池稿嘉樹軒紀聞并蒲菴集藏於家

應天府尹贈都察院右副都御史孫公墓志

銘

袁焯

公諱懋字德夫少穎異沉潛篤學弘治壬子中鄉試
辛未第進士知蒲城縣籍有忠政考姝等三年召爲
南京吏科給事中陞廣東布政司右參議按察司副
使兵備清遠以詰中校恣橫被矯誣械至詔獄貶滕
縣典史改貴溪復以安福令陞光州守山東按察副
使廣西江西參政廣西按察使右布政使至今職升
沉歎歷苦節自茹者三十年時論歸重亟欲致公當
道以挽世俗然推公者數四不果用而公年已七十

例當自陳或勸公少待弗可疏上奉旨致仕去之日
行李蕭然南都父老與一時卿大夫咸惜公且服其
去之決也公爲給事中夔幸用事乘輿數巡幸中外
洵洵言者輒杖死公曰吾言官也可畏死乎言之至
數十上都督朱彬尤佞幸導上縱所之遠去公劾之
其略曰歷觀自古國家信用奸邪未有不爲所禍蓋
其始也媚君以邀寵其終遂挾君以自恣必至於危
宗社乃已臣按朱彬以臬雄之資懷儉邪之志自緣
進用專事從諛游行馳騁凡可盡 聖心無所不至
乃於去年導幸南海子幸功德寺又幸昌平地漸遠

日漸久遊樂無節輕褻至尊流聞四方駭人聽自
知罪盈惡積公議難容乃挾 陛下自此故又導駕
遠出居庸無大臣一人保護 陛下孑然獨處苦寒
沙漠之地殆將半載臣觀彬武夫前代漢高白登事
或有未知至如 英廟土木之變則固圍之矣乃導
駕臨宣府又過大同致惹虜賊派人應州與之交戰
六日夜使當時各鎮兵未集幾何不蹈往轍也 聖
駕在外萬幾叢委 兩宮違養郊廟不親四方災異
迭見盜賊蜂起彬在一日爲宗社一日之憂乞將彬
拿送法司按罪重處以雪神人之憤 陛下端居九

重親理萬幾宗社天下幸甚及宸濠倡亂駕幸南

京公與參贊喬公修力同心隨機防護濠監泊龍江

逆黨錯繫諸司而彬等益導上夜遊伺伺竊發公

憂之乃伏闕屢請迴鑾辭甚激切其一曰人君所敬

惟天南郊大祀之典何可以不早行所養惟親皇

太后千秋之節何可以不及時稱慶所任者庶官也

考察之政雖委吏部而黜陟幽明尚煩宸斷所重者

賢才也會試雖屬春官而大廷賜對必俟臨軒凡此

五者皆國家典禮大政事舉廢遲速之間實安危

治忽攸繫我皇上果有大業爲心固宵旰所宜

孜孜者也臣近又聞之途左諸鎮虜軍連營朔州等處強賊嘯聚豈不以 駕方遠出京城空虛將以掩吾不備南自淮陽北抵順天隨路夫役祇汲日久饑餓無聊或至相食况又農務之方殷邪詩曰不留不處三事就緒又曰徐方不回王曰還歸然則古昔明王自將未嘗不以農事爲重班師爲急也旬月以來暴雷震驚風雷大作災變之至誠亦有因尤不可以不異也其二曰震濤大逆不道罪在亟誅今寢食自如覲生變豈非所以豫亂防也忠臣義士戮力成功大賞之典久格未行非所以勵人心也大地者人君

之父毋人子不可一日不見父母人君不可一歲不
祭天地南郊大祀可復遲乎賢才國家器用齊民不
能一日不資器用國家不能一時不須賢才臨軒策
上可復緩乎然則今日舉輿旋軫郊祀宗廟太皇太
后祔主此固事之至重至大者也若軍馬數萬住劄
日久應給芻豆在在告乏旦夕將有不繼之憂秋高
馬肥虜易爲逞天威旣遠戎心益生西北難免侵陵
之擾北來章疏奏進雖降有明旨前後之間壅滯尚
多百司何所奉行南都市廛率多官軍住歇工商廢
業生理蕭條小民何以堪命况夫元兇寄泊于江滸

逆黨雜繫於狴犴防衛既久人情懈怠倉卒生變何以禦之臣聞應天府獄南門街往往夜驚羣賊此固人心不安憂疑之所致實乃天心仁愛譴告之有在也仰惟 皇上睿炳幾先明見萬里意外之患所宜

預防臣待罪言官不知隱諱伏惟採納以承天意以安人心實宗廟社稷莫大之幸時值彬生日衆期往賀公曰懋抗疏欲置之死今復賀其生非情也彬雖深憾之然實因公不敢輕動 皇上嗣位以端本正始聖德聖學聖政三事首陳嗣聞雷擊奉天門獸吻及日精門災又陳修八事以答天眷七事至進用老

成篤揚忠義殛誅奸佞翊 聖上中興之治可謂不
負所學矣公在廣東時龍眼洞作耗當事者僉議勦
之公以該道兵備乃命衆先管堡口海村良村蘇渡
口井濠坪分兵屯守然後進征功成當事欲爲奏報
公曰妄殺徼功非吾素志穢厥率魁散其醜類足矣
功不滿百何以報爲乃寢其後龍眼洞復叛攻掠州
縣惟舊有營堡者不敢犯公舉動不徼小利不急近
功槩如此其他隨在布惠無不遺思公每自引驍故
多弗傳若河南均田應天損舖戶供應迄今民頌其
便至其立身廉介處事周詳存心平易不爲勢利不

以物遷善不求知於人言不求文其行則公之天性
然也歸之日出俸餘建祠宇置祀田岳先墓周賻親
友囊無長物蕭然壞堵讀書其中融然不知老之將
至時與比隣諸老散步往來笑談終日人望之爲神
僊而公自不知其異於人也以嘉靖辛亥六月九日
卒於正寢明年仲子黃州推官焯來京師以例乞恩
於朝上若曰嗟夫斯古之遺直也幼禮工論祭營
葬加贈顯秩今上祇慎名器卿寺以下非功勛異
等不獲贈公遭異數一時公卿相與慰籍不已以爲
公未究之報云

應天府府尹唐公寬墓志銘

寇陽

公諱寬字秉夫姓唐氏別號棠山世爲平定州人公
生而穎異自童時卽有大人矩度治尚書不屑屑於
記誦惟以解悟爲文奇氣過人意表伯祖盛能鑑人
目之曰此子必高吾門年十五補郡庠生嘉靖乙酉
領鄉薦明年春下第篤志問學不休壬辰登進士筮
仕永平府節推卽明慎用刑凡所推鞠無不得情者
太守王公褒獎有職任不修乎過幅清操無愧於神
明之語治三載考績陞刑部福建司主事戊戌陞員
外郎未幾轉郎中奉勅恤刑陝西平反甚衆壬寅陞

懷慶府知府會民疲其公薄稅省刑鋤強扶弱時鄭
府官校倚勢凌雲平民公每執而杖之又有鄉官掘
城土造屋罪其家人疏其車牛百姓稱快因被毀於
憲司稔知公之廉節竟莫之信也且以毀公之人語
公後公與毀之者遇諸席公絕口不言禮貌如初毀
公之人深自慚愧爲政三年百姓富庶教化大行士
民欲立生祠公聞之力止乃寢其事丁未陞肅州兵
備副使肅近玉關番漢相雜素稱難治公爲政不剛
不柔撫綏有方夷人畏服不敢爲暴有獻遠物者公
性不好珍奇卽卻絕之由是遠人益畏邊圉寧謐時

有無碍紙價千金常例官取入橐公毫髮不取有勸
之者公艷然曰若敢我爲不義耶遂作支用戊申陞
陝西行太僕寺卿肅衆感公德政臨行遮道垂泣留
靴爲別云巳酉丁繼母憂還服闋補甘肅行太僕寺
卿癸丑入賀 聖節歸未抵任丁父憂服闋補陝西
苑馬寺卿戊午陞四川右叅政尋陞四川按察使公
發奸摘伏剖決如流吏畏民懷咸稱神明庚申陞山
東右布政明年轉左先任者率任庫吏刁索納戶公
知其弊親爲閱視納戶大省浪費時撫院嚴治窩盜
者逮及士夫一方騷動公每爲勸解中外多之壬戌

入覲陸太僕寺卿未幾忽起尊鱸之興語人曰吾精力漸衰虛糜廩祿恐負朝廷盍退處山林以終餘年乎遂上疏乞歸上不允辭陸應天府府尹公不欲往因憶幼年曾夢至南京乃強爲一行至見南京景物宛如夢中嘆曰吾夢旣應終於此矣遂於是年歸越二年卒

應天府丞楊公琛墓志銘

呂 柟

公諱琛字仲玉姓楊氏松江華亭人仕爲應天府丞以災異懇乞休致歸歸未幾卒於家寔居靖八年八月十七日也其子吏科都給事中秉義以狀問銘初公嘗兩爲南京吏部考功郎中遷尚寶少卿去朝命以柟補公缺方是時予未習考功也至則凡課官察吏一遵公舊或有疑事難政必稽質公所定箝行二年得少免於愆若公之當考察也悉心延訪務得其情雖冢宰中丞咸駭稱神有二三被黜者倡言回證公指實以答罔不慚服予若值茲遐步三舍矣當是

時已自考功改武選廖家宰紀遷北以公剛正篤實
徇公任怨也乃又自武選改考功云於是李司寇承
勛張中丞琮及朱冢宰希周曰揚考功正直不負廖
舉胡少宰世寧有位愧楊前之嘆皆予耳所聞也公
陞尚寶以不便水土辭辭未赴乃戊子陞應天府丞
時陳京兆錫屢疾在告公數畧案節財均賦平物砥
價都人士稱便焉故事讎家多假手獄卒甘心繫囚
公時巡獄中飭囚病非累藥不效勿狀全活甚眾江
寧丞王震貪酷事覺震已陞他縣囑者劾午公曰彼
邑之民奚罪焉竟坐於法彭鶴齡者深陽民也嘗忤

母舅舅誣爲盜詞服賦少公曰鶴陰說非甚貧何利
於此卒得其誣其慾奸釋寃類如此則予目所見也
公舉辛未進士筮仕桐鄉桐鄉當八省之衝民罹於
逆送乃與查覈節制者爲定籍狡猾折夫之徒盡繩
以法然不能當巡按意也乃以賢能薦調開化實游
之也去桐之日民輟耕罷市攀轅戎路以送開化人
好訟聞重利輕生甚至飲藥斷腸取快小忿生女不
舉以啗嫁貲公痛與懲創頑愚多自以生其牧馬金
鎖之豪沮饒信姚源之盜寬殘破之賦尤爲人所懷
服爭立生祠稱曰鐵知縣云御史王君亮封至考以

誠心愛民語益公自是進陞刑部主事矣在正德乙亥年也明年乞便養母改南京驗封主事厥後考功京兆之政皆自桐鄉開化也初公幼有異質端凝簡直父母殊愛之及就外傳頴慧絕人年十二倩溪周寧素爲女相攸見公喜歸索飲至醉弱冠有先正曹憲副時中者許其英敏可希古聖賢公時讀書龍門僧舍外家每饋時羞則曰燦獨不能斷葢畫粥耶棄之以餽鼠又嘗讀書城南鄰女欲假汲以挑公公曰吾可讓魯國一男子乎斥之每試忤學皆列高等與兄憲副公瑋齊名時稱松江兩揚王督學鑑之至分

廩以贍嘗師莆田方先生岳於秦州所交皆知名士
既中弘治乙卯鄉舉遭父贈君營繕公喪時兄憲副
方第進士觀政也公哭踊委頓與叔弟琦季弟貢士
璉殯殮如禮飽口太安人檢蔭得封君為諸子所產
狀示焉公哭不忍祝曰吾父為此將慮吾兄弟改葬
端耶吾兄弟不體是心而或後言者非子也焚之友
愛二弟益篤於是公之文行大著而鄉士子從遊者
門無停履多科第云嗟呼公耆友積於家庭端諒重
於鄉間如此宜乎莅官行政迺邁尋常也公先世上
海人遠祖為府別駕其後有博學者稱兩脚書厨白

是皆以儒鳴沙岡間高祖壽梅公諱德時曾祖樂耕
公諱景臯贅於翁氏始家華亭祖月溪公諱文信授
散官考南隱公諱雲字民望以長子憲副公貴贈工
部營繕司主事妣宋氏封太安人自南隱公以上皆
蓄而未發乃至公始大顯又以及其子給事中則公
之懿行善政豈偶然哉公生天順甲申十二月二十
八日得壽六十有六

應天府治中龐公嵩傳

京學志

公名嵩字振卿居南海弼唐鄉學者稱爲弼唐先生
嘉靖甲辰山鄉舉授應天府通判晉治中先後凡八
年大京兆缺屢攝府事初至早愷爲災公督賑安悉
霑洽公粟既竭貸之鄉先生富民誠意懇惻人多應
者所全活六萬七千有奇已而芻其積道於以勞卒
拊循之所繇以復業者十萬六千有奇所部民苦役
重公取公費議寬之令甲首輸銀免其置辦付之印
簿以防侵漁清寄居客戶以助夫役移僻驛馬廄以
甦衝塗嚴冒濫優免及詭納官戶寄庄戶女戶神帛

堂匠戶以實丁口八邑皆蒙惠焉時江寧葛僊永豐
二鄉數有水患居民餘七戶而已歲課不能辦公爲
築堤開萊得田三千六百畝立惠民庄四召貧民佃
之流移盡還而全邑訖無代輸之苦百姓至今賴之
折獄無細大必得其情有張元二者以追逃婦不反
公躬至婦所見室畔縣崖矗立林木颯然心動行數
十武而前佯執村老訶問之對曰我但見屍遂得元
二殺人狀又高淳僑人亡其妻妻家以爲死執之公
偵知鄰有畫工以其妻歸日逃也計致畫工奪還之
聞者以爲神戚晚王湧舉人彭若龍古良人妻殺其

夫公并論死居間者萬方拒不聽公饒吏幹在事拮据百廢具舉尤加意造士暇則進諸生課之自損俸以資賞給歷寒暑無倦淹通五經爲諸生發疑扶異無不虛往實歸者早遊王陽明湛甘泉兩先生之門至是奉其緒論爲諸生規建會於新泉書院日與講習以故一時文行之士成就興起者爲多性嚴明嶄嶄不可犯而又與有聞於名儒巨公以是施之政亦以是持其身見義勇爲篤信一力雖責育不能奪也單騎行縣所至肅然一蔬片楮不以煩民人目爲麗青天云府在六年京察例而復與觀察公謂非理上

疏請止之至今著爲挈令晉南刑部郎中曲靖軍民
府知府在所士民銜德既去而追思之葛儂鄉有特
祠至今俎豆不絕云

應天府通判林公春墓志銘

倪謙

公諱春字孟陽姓林氏其先台之寧海人曾祖某洪武初以戎事遷居金陵祖某又遷山西太原府右護衛父本榮又遷代州至公又遷萬全都司龍門守禦千戶所至宣府乃定居焉公生於太原性資穎異有志於學比來宣府時紹紳儒碩誦居於是者衆公往從之資其講益人萬全都司爲弟子員習尚書博覽羣籍學日宏肆爲程試之文深有理致尤工古文辭鄉人多持卷軸求之家有其作精於書翰景泰庚午應順天府鄉試中式會試中副榜當得校官不就入

太學放依親歸參政葉公盛舉同纂修都司地誌搜
考訂定善於序述持身端慎遨遊公卿聞惟以禮接
一言不及外事有事遠繫者多齋重賄要其解釋力
謝絕之難以禮遺以金帛者亦却不受人皆曰士居
貧而能有守若此真難得矣復入太學從翰林學士
呂文懿公卒業志期必舉進士文懿嘗嚮予道公之
學之才之美予已知其人而未識也天順中予爲權
臣所陷謫宣府嘗至學宮見少師楊文貞公扈從北
征詩刻石堂上碑陰刻吏部尚書王文安公記公所
書也予初以爲養正書問之乃云公書又於他處見

其所書已作甚多歎曰名下無虛士信哉未幾公乞
假歸始獲面晤言溫氣和薰然君子也鄉人素愛之
延請者無虛口多速予以陪公能飲至數斗不亂酒
半必捋拳商射呼笑爲懽意度灑如也後別去意其
必舉進士竟不成待次吏部僅授應天府通判專理
馬政人咸爲之惜公曰始仕得六品京官於吾足矣
所患職弗能稱耳及至官以清節自厲攻訐考牧恪
盡乃心公平不苛民受其惠無敢干以私者每行縣
輒閉止食公廩一毫不取於民時蔬公解隙地至則
摘以自給其廉如此或有笑其迂者公曰我儒者誠

迂若楊伯起則古之迂者也我願學焉初考獻績於
朝吏部以最聞詔嘉之錫以勅命進階承德郎贈其
父如公官贈封母妻皆安人再考復以最書政聲日
起性酷好書每暇輒磨墨伸紙揮汗呵凍寒暑不廢
字體清勁道麗得之者皆珍襲之予幸被宥還復得
與公胥晤南京相處者六載每造公必留飲至醉呼
笑之樂不減疇昔今年暑氣最熾公中暑毒適當開
科屬理場屋事勞遂成痢疾不能食予往視之言論
尚如平時不數日竟卒嗚呼孰意其遽止於斯哉公
爲人外雖和易而內實剛毅處兄弟友愛交朋友誠

信接寮寀敦睦居官孳孳愛民廉介之操乃其素志
不以始終有變故其卒也貧無以爲殮哀積衆賻僅
能舉其喪歸其制行可見矣公生於永樂辛卯七月
九日卒於成化辛卯九月五日享年六十有一

京兆呂君言傳

屠應峻

英皇帝以後嘉興有大臣者三人矣大學士文懿公
原大司馬襄毅公忠迨吾先公康儀皆有功德於時
崇爵顯誥錫之天府以施于後世其子孫亦多修其
先人之業故郡稱世家者必曰三氏云京兆君姓呂
氏名言字伯時文懿公孫也文懿公當英皇帝時
簡入內閣佐上理庶政無弗當上意者而決又
教導太子文懿公卒太子泣謂上曰呂先生死
矣呂先生兒在下是上亟問所謂呂先生兒者而
公長子憲入奏計乃詔以憲爲國子生守授中書舍

人仕至太常卿太常卿娶沈淑人生京兆君性簡朴
異羣兒而又故呂氏也羣兒皆畏事焉七八歲時同
羣兒出野野有鴛兒或竊鴛歸君怒曰若弗學他卽
學盜吾不願見盜吾終身不願食鴛矣於是羣兒
弗敢見也當是時君業時文矣比又從太常公業詩
十五六時諸老生以爲弗若也志氣銳其謂可立致
上第顧數試數不第乃以蔭補太學生又數試太學
數不第其以爲弗若者皆數第也君乃自諉曰吾先
聞人之裔也吾祖邁德紆謀其后太常公宣直亮不
無替顯休夫人所自致者奚一第已也雖一命足以

見志矣遂棄不就試歸歸十餘年而當止德甲戌始
入選試吏部授太平府通判太平近江商賈往來郡
故咸有稅通判至則令曰夫商賈國有恒稅郡今又
稅是重以困也其弗稅商賈益纒纒來集矣初高
帝起兵鳳陽與太平諸郡接壤詔戒諸郡田租然令
戶飼馬官就閱其駒歲歲上之民無所苦其后政嚴
諸郡民日貧飼馬馬多死率購他郡駒閱之官官索
賂弗得則曰非良駒也斥弗遺必賂乃可而京師遠
數千里復以其駒馳數千里比至則困敗不任用適
計其費大率三致一耳以故太平民窳匿不願飼馬

通判職專馬乃官且經畫行邑勸勞如故事每一令
出民必曰新判令也便于是竄匿者稍稍歸君又嘗
有馬政疏矣其略曰制不可更法不可泥今江南駒
少北地多且良請令民歲輸銀上之太僕太僕就京
師購良馬不困敗而費省十九官民兩利會君以繼
母喪歸不果上居繼母喪三年而改應天府通判以
故人稱京兆君京兆君至則江南大饑人相食流民
就食應天者數十百萬而又疫甚死者遍野君受節
賑濟親給食飲不少遺流民存活十二然自是君病
矣遂懇乞致仕

卒春秋蓋五十八云夫京兆君歷三仕幾八年矣妻子弗以隨惟一童子年十餘耳平居治政常日晏不知食卽食無重味數日才一舉肉弗飽也中丞吳公時巡撫江南阿叱羣吏無敢近每見君入必肅然起曰廉判來廉判來以故僚佐多忌之而又好議天下事若濶遠無近功然卒有大致乃人曰京兆君迂君亦曰吾迂吾迂弗較也性篤孝少喪母晝夜泣不絕時太母徐孺人在也比太常公娶陸淑人陸淑人善嚴于是托公于母家朝夕惟徐孺人之慕時時詭曰豈有人子而弗善事母者哉夫子故有罪也于是遁

回徐孺人始大喜太常公喪公大慟幾絕凡三年而後復故太常公卒時君無所取惟陞淑人所欲與弗私也是其人豈內外異致者哉予觀世之人有一能者率皦皦務眩外惟恐人弗知密構顯頌馳逐公卿間以故並躋寵榮京兆君懷異才善自守論議勿下人遂負氣阨塞抑鬱抱病死嗚呼傷乎往予遊南都時與君同舟也前有欹橋君遽起曰夫舟行值橋墮柰之何泝橋危途行安乃遂途行此其心豈行險弗知命者其顧肯皦皦營利若今之人哉佛說其明視其冥冥是非其冥冥者即京兆君要項氏表投女孫與子婦兄弟也生子仲恂恂而文爲子交鳴呼源流遠矣

祝京兆允明墓志銘

昌黎

先生諱允明字希哲蘇之長洲人也其先出古太皞以官氏或曰黃帝之後封於祝以國氏云七世祖碧山勝國時由松江來守郡後卒官一子留於蘇遂爲蘇人祖顛正統己未進士終山西布政司右參政父獻母徐氏大學士武功公女先生少穎敏五歲作徑尺字讀書一日數行下九歲能詩有奇語旣天賦殊特加內外二祖咸當代魁儒且濡正染不離典訓稍長遂貫綜羣籍俾官祿家兩遐鬼瑣之言皆入記覽發爲文章崇深鉅麗橫從開闔茹涵古今無所不有

或當廣坐詼笑雜選投毫疾書思若泉湧一時名聲大譟歲壬子舉於鄉故相王文恪公主試事手其卷不置口必祝某也既而果得先生文恪益自喜曰吾不謬知人自是連試禮部不第當道奇其才會修史將名薦之弗果初仕興寧令地介嶺海民尚譁訐惑於禳祥先生示之禮簡進秀異授以經學親爲講解遂一變其俗羣盜竄處山谷時出焚放爲設方畧一旦捕得三十餘輩邑以無警稍遷通判應天府亡何乞歸又五年卒春秋六十有七夫人李氏鄉先生太僕少卿應禎之女子男二長續進士入翰林果遷陝

西按察副使先生簡易高瞻不樂拘檢在泉若無能者然默而好深湛之思時獨居著書解衣槃礴游心玄澹賓客來者叩戶呼之若弗聞也性善書出入魏晉諸家晚益奇縱或購得之輒焚去爲榮喜與掖後進終身不言人過其爲家未嘗問有無得俸祿及四方餉遺輒召所善客與喙飲歌呼費盡乃已或分與持去不遺一錢故其沒也幾無以敘云先生少有意用世旣濩落不試一發於文雖學實閎振猶非其志也所著書合詩文集爲數百卷藏于家陸繁曰斯文之用與天地準由漢氏來緝言之士係于斯極者亦

僅可數已明興百年士猶膠守章句未覩其恢然者
也乃 憲孝之際始彬彬矣祝先生出諸生起覃精
發藻橫逸踔厲超追古昔盛哉若其湛浮自得龍變
不羈大觀逍遙廓然離俗矣夏侯湛贊東方生云明
濟開豁包含弘大拔乎其萃游方之外者殆先生哉
殆先生哉先生沒以嘉靖丙戌冬十有二月二十七
日所著有祝子通若干卷祝子罪知若干卷祝子雜
若干卷蠶衣一卷浮物一卷成化間蘇材小纂若干
卷野記若干卷語怪若干卷語怪四編若干卷江海
漫錄記一卷金石錄一卷興寧志五卷詞文集六上
卷後集若干卷